



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Iran aser US na Oman nung nuclear atema sensak asemtsü

ICC Men's Player of the Month atema Iyer nominate süogo

VOL. XXII ISSUE NO. 175 (ADOK 175)

DIMAPUR

RASEMNÜ WEDNESDAY

RONGCHII (APRIL) 09, 2025

₹ 5.00

Nagaland nung Apr 15 tashi tzünglu arutsü

Dimapur, April 8, 2025 (TYO): Nagaland nung April 15 tashi district ajungalen ama tzünglu terara arutsü aser tsüingsang majungtsü ta Nagaland State Disaster Management Authority (NSDMA)-i Mongulbarnü metetdaksüogo.

Tesem kar nung tsüngmok atena aser tsüngi aia tzünglu arutsü ta NSDMA-i ashi.

Iba mapang Kiphire, Kohima, Longleng, Mokokchung, Mon, Noklak, Peren, Phek, Shamator, Tseminyu, Tuensang, Wokha, aser Zunheboto nung tzünglu

kanga arutsü. Tanüngba district tem nung tsüingsang majungtsü aser tzünglu terara arutsü.

NSDMA-i nübortem dang tsüngi aser mopung tesashi nungi jenbua alitsü metetdaksüogo.

Nagaland kübok tenemlen tzünglu aruba ajanga Dimapur, Nuiland, Chumoukedima, Bhandari, Baghty, Tizit, aser Tuli dena lendenlen aser foothill district tem nung tzü atsüngdentsü aser ajungben tzümetsüng timtem ajurutsü akok ta NSDMA-isa metetdaksü.

State Mega Legal Services Camp atema renemshir

Dimapur, April 8, 2025 (TYO): Supreme Court, Centre sorkar aser Guwahati High Court nungi teshimtet nübotemi Nagaland semdangtsü aliba atema senden ka menogo.

Chief Secretary, Dr. J. Alam IAS menden ser April 8, 2025 nü AHOds aser HoDs den senden ka amen.

Supreme Court nung judges, Union Minister of State for Law & Justice aser Guwahati High Court nung Chief Justice o Judges-i April 12, 2025 nü Nagaland semdangi arutsü sentong lir.

Tanü senden nung logistics, transport, security, traffic, aser

department balalai shilem agitsü indang onüktem lemsatepa liasü. Parnokisa department balalai exhibition stalls lapoktsü indang jembitep aser departments nem mapa lemozüksü.

Iba senden nung AHOds & HoDs, Administration, Dobashis, College and School Students, Village Councils, Town Councils aser Civil Organisations adentsü.

Maneni, Ministry of Law and Justice, GoI, Supreme Court of India, Gauhati High Court, National Legal Services Authority aser sorkar departments aika iba sentong nung adentsü imlar.

Zeliangrong tsür ka tepsetba khukhua aitsür

Dimapur, April 8, 2025 (TYO): Chümoukedima District kübok Pimla nung Zeliangrong tsür ka dak taochi mesayui mapa tamajung inyakba khukhua aitsür ta Western Naga Youth Front (WNYF)-i metetdaksüogo.

Iba ya tashiyim agi shi nung medemba sülen tepsetba tatalokba ka ama temulung melemi bilemer. Tangatetertem aliba loktiliba ka nung iba ama tesempatsü mapa inyakba magizüker aser khukhua aitsür ta WNYF-i ashi.

"Iba tejashi aser mangyimba mapa onoki tetsürlar kibong aser Zeliangrong nunger ajunga den külemi noktaker. Iba takoksa atema temulung zürepa süneptsütsü atema o kecha mali saka onoki temeten aser ochiba jungkai adoktsü atema nungittsü nangzüker" ta WNYF Convenor Aga Rengma-i sangdong ka nung ashi.

WNYF-isa ozüng amertem dang tekaratiba nung bushisüngdang asütsü aser aibelenertem pua tapet temerenshitsü agütsütsü ayongzüko.

Naga kintem aser civil societies-i ibala mapa anema ola adoktsüla aser külemi longjemer tetsürtem, tanurtem aser tai maketba taküm temetentem kümzüka ayutsü tenangzüka agitsü ayongzüker, ta pamokisa ashi.

Dimapur Ao Youth Organisation (DAYO) aser

Dimapur Lotha Youth Organization (DLYO)-ia sangdong balala ajanga Mhaikam nungi tetsü ka tepsetba atema aoksaba aser temulung raksaba metetdaksüogo.

Iba ama tesempatsü mapa ya asen Naga sobaliba nung shilem kecha mali. Temulung zürepa mapang DAYO-i lar kinungertem, medemertem aser lokti den külemi noktaker ta Media Cell sangdong nung ashi.

Iba tatalokba khukhua aitsür aser ozüng amertem dang aibelenertem pua merenshitsü atema jungjunga bushisüngdang asütsü ayongzüker. Maneni senso ajaki iba tatalokba kuli metettsü atema akokba tashi yariteptsü mepishir ta DAYO-isa ashi.

Dimapur Lotha Youth Organization-ia iba tatalokba aitsüba metetdaksüogo.

"Iba tatalokba ajanga nübortem mulungsentsü nung kongshiogo aser iba ya asen loktiliba anema inyakba mapa ka lir. Loktiliba nung züngsem ka aser talisa tetsü ka dak iba amai inyakba ya kodanga magizüksü" ta DLYO-i ashi.

Onoki district administration aser police dang sensotem aser talisa tetsür o tanurtem kümzüka ayutsü atema security maparen akangshitsü ayongzüker ta DLYO Media Cell sangdong ka nung metetdaksüogo.

Indo-Myanmar arrtsü atema tanü Kohima nung sentong ka agitsü

Dimapur, April 8, 2025 (TYO): Angami Public Organisation (APO) den Kohima nung Naga kin unit ajaki April 9, 2025 nü public rally ka ayongzüka lir.

Indo-Myanmar arrtsü atsüdangba aser tanga onüktem atema parnoki iba sentong ya Old MLA Hostel junction nung anepdang 10:00 ako nungi tenzüka agitsü.

Sentong nung APO president Thejao Vihienuo-i okila jembitsü, senior advocate Timikha Koza-i ozüng tsütsü onük jembitsü aser

Kohima Sumi Hoho president K Shiwoto Wotsa-i pusemba o jembitsü.

Iba sentong agiba sülen APO aser Kohima nung Naga kin unit ajaki Nagaland Governor ajanga Union home minister Amit Shah dangi shidi ka yoktsü.

TRAFFIC TETUYUBA AGÜTSÜR

Iba sentong agitsü aliba atema Kohima police-i Mongulbarnü traffic tetuyuba kar agütsüogo.

High School/secretariat tsütsü aoba garitem TCP Gate-Hospital

Junction-Census Point ajanga senzüdaksütsü.

PHQ tsütsü aruba gariem Razhü Point-Naga Bazaar ajanga süidaksütsü aser secretariat/directorate-i aoba bus garitem TCP Gate-T-Khel Model Road ajanga senzüdaksütsü ta Kohima Police-i metetdaksü.

Maneni, TCP Gate nungi Y-Junction Phoolbari tashi no-parking zone asütsü aser iba tetuyuba ya rally matem tashi alitsü ta Kohima Police-isa ashi.

Sardar Patel-i sayuba sülen anidaksü: Congress Working Committee

Ahmedabad, April 8, 2025 (Agencies): Mongulbarnü Extended Congress Working Committee (CWC) senden amending Sardar Vallabhai Patel-i sayuba lenmang nung jajätsü bangjemtepogo.

"Tanü ozüng alema inyakshangshitsü aser kin o kin lemdangtsü tangatetba yur inyakshangshiba ajanga tamangba yimsü nung ajemdaker tesempatep adokdaksüogo. Anungji Congress Party-i maneni 'Iron man' Sardar Patel tangatetba beshitsü nangzüksü" ta CWC bangzüng nung shia lir.

Iba bangzüng ya 'Flag-bearer of freedom movement- Our Sardar Vallabhbai Patel' ta jaloka

lir aser BJP-i Patel senzüka yutsü ta aitsüba meyiptsüba lir.

"BJP-RSS külemi tasa atonger Sardar Patel aser tanga national heroes senmang raksatsütsü meranger. Linük nüjiso bushiba mapa nung Sangh Parivar-i shilem kecha magi" ta AICC president Mallikarjun Kharge-i ashi.

Mahatma Gandhi tepsetba mapang Patel ya Union Home Minister liasü aser pai RSS noktang ta Kharge-isa ashi.

"Tesempatep aser telemsa adokdaksütsü merangba tashitem anema onoki Patel-i sayuba tangatetba beshitsü. Onoki taila osangtem prokshirtem jungkai adoka sayutsü" ta CWC bangzüng

nungsa shia lir.

"Item tashi ajanga Sardar Patel aser Pandit Jawaharlal Nehru tsüngda mangatettep liasü ta tiyazü aika purateta prokshir. Ajisüaka iba tiyazü dak mamanger kechiyong Sardar Patel-i August 3, 1947 nü Pandit Nehru dangi shidi ka züluba nung tena tesentaktep tajung aliba jangjajangia shia lir" ta CWC bangzüng nungsa shia lir.

"Ana tsüngda sentaktepba aser kati ka meimtepba aser külemi inyakshangshia arur küm 30 shi ajunger. Ana tesentaktep ya raksatsü makok aser iba nung ana indang tashi lir" ta Patel-i Nehru dangi züluba shidi ka CWC-isa lemsatepogo.

Mkg Forest Div pur Nagaland Forest Management Project (JICA) annual review meeting agiba osang

Mokokchung, 8th April (TYO): Mokokchung Forest Division pur Mokokchung district nung 2024-25 kümsük Nagaland Forest Management Project (JICA) mapatong inyakba indang asadangba 'Annual Review' senden ka yangi Hotel Whispering Winds, Mokokchung nung takok manung kaogo. Iba senden nung District Advisory Committee aser DMU Mokokchung nungia ketdangsürtem densema liasü.

Iba senden nung tetushi tejaoker

Mokokchung D.C, Thsuvisie Phoji-i jembidang, tawa tanü arem tulu rungtoka mi lendong atalokbatem to bushidangra nisungi yangluba teimba lir, ta ashi. Paisa tawa Mokokchung tesem balala nung arem rungtokdang concerned department-i anir nübur teyaritep ajanga mi lendong kanga junga azüoktetba asoshi tenüingsang agütsü.

Tanü alima ajunga nung mi lendong kanga buluba ya talisa alima tsüka akümba aser meimchirtemi arem lentokba

maparen ajakji sentaktepa lir, ta ashi. Tawa Mokokchung nung mi lendong tulu atalokaka tia junga nisung asüba kata mali, aji saka, "asenok mekümdangba ajanga lendong tulu ajuruogo, nisungbo masü saka arem rungtokbaji takoksa tulu lir", ta pai ashi. Asenok züngkümshia lira lendong balala aruaka koktetttsü aser jenbutettsü, anungji, teti kükümshia alitsü asoshi Mokokchung DC-isa tekümdangtsü olen ka lemsatep.

(Maneni tapak 2 nung...)

Assam-Nagaland arrtsü anasa aluyimertemi lungkak ait

Guwahati, April 8, 2025 (Agencies): Assam aser Nagaland tsüngda mapang talangka arrtsü atema mangatettepi aruba ajanga arrtsülen tensa mejungi kümogo aser Mongulbarnü Shantipur nung aluyimer noklang aika adenshir lungkak aitogo.

Merapani arrtsü anasa Shantipur nung aluyimertemi lungkak ait aser parnoki Nagaland sorkar ajanga ashishitep aketba ali nung palm oil cultivation asütsü mapa inyakba aitsü.

Aluyimertemi "We will not

give up our land. We need our land" yimyim ayima lungkak ait.

Nagaland Agriculture Department ajanga Velouguri Seed Farm area kübok ali 1,200-acre nung tsünüsenbong kecha masütsü tetuyuba agütsü. Ajisüaka, Assamese nunger aluyimertemi iba ali nung küm aika aluyima arur.

Nagaland sorkari iba tesem nung palm oil plantation projects tenzüka ali agitsü meranger, ajisüaka iba ali ya Assam lushi nung lir aser kümtem süia arudang tanemtanemi atsünga agia arur ta aluyimertemi ashi.

Velouguri Seed Farm aser Assam-Nagaland arrtsü tebilemtsü ya tang Supreme Court nung ken o benoka angadanga arudar. Ajisüaka, Nagaland sorkari tang inyakba mapa ajanga Assam nung aluyimer kibong 1,000 dak kongshir.

Nagaland sorkari parnok tangatetba nung aser tashiyim agi mapa inyaker. Parnoki ozüng amertem dang asüngdangya masür aser iba ajanga arrtsülen tensa mejungi kümogo ta aluyimertemisa tai tongloksüogo.

CTSSportal nungzüngoksemtsü metetdaksür



Training Institutes balala nung 2 year course (2022-2024
training agiogo parnok dang sessions) atema 2nd year
Stipend agitsü atema CTSS trainees tem portal nung apply
portal (https:// asütsü menügdaker, kechiyong
serviceonline.gov.in/ parnokbo züingoksemer lir.

directApply.do?serviceId=2600)	Portal nung züngoksemsü
nungApril 15 nungi May 15 tashi	atema tenüngdakba kuli kaketter:
nung apply asütsü	1. Passport size photo.
metetdaktsüogo.	2. Front page of Bank Pass

Maneni trainees shirnok	Book
agüja aliba portal nung apply	3. Govt. ITI Identification
mesüteter parnoki portal nung	Card.

Mkg Forest Div pur Nagaland... (TAPAK1NUNGI...)

Tanü NFMP-JICA kübok
committee balalai maparen
balala inyakba osangtem
agütsüba nguogo, tanü iba ama
maparen balala inyakba ya talisa
sarkar nungi senotsü aruba
ajanga lir, saka tang amai teti
dangbo iba mapatong atema
senotsü marutsü, ya küm tetaktet
atema dang lir. Sarkar nungi
jenjang talangba aser talangba
amshiteter, saka iba jagi alima tzü
mopungbo kanga mejungi
menentsür, anungji, asenoki tzü
mopung wazüka ayutsü
merandang alima meraksa
akok tashi alima nem teyari
agütsütettsüsa yimyalibaren dak
rangloker inyaktsü paissa
ajungshi.

senotsü aruba anener külena Iba senden nung DFO cum
tang amai inyaksü renema lir DMU Head Mokokchung, Dr.
mali? ta paisa asüingdanga ashi. Sentitula IFS-i Nagaland Forest

Tanga department nunga iba amai sarkar sentong tajung aika lir, aji saka, meilongi item achayangba committee den kiojen aser osettsüset aika samaogo, yamaji tang NFMP-JICA ya-a project tajung ka lir saka asenoki koda bener aor ta asübaji tongtibang lir, ta pai ashi.

Yim kar nungbo sarkari teyari tera agütsüba nung yimertemi bendenloker moraloka inyakba angur, iba asoshi pelar, ta pai ashi. “Mokokchung ya Nagaland (JFMC) balala tenzükba aser iba mapatong ajanga district nung arem wazüka ayuba aser temelenshi bener arubatem metetdaksü.

songjen asoshi dang masü India Sentong nung Changtongya
aser alima ajak asoshi tatishitsü New, Merangkong, Aliba,
sayuba district ka sütettsü Chungtia aser Mangmetong
merangang”, ta pai ayongzük. yimsüngtem nungi JFMC

'Küm ka ana inyakba jagi ketdangsürtemi pei yimtsüng
takok tamakokii iunga nung mana balala inyakba takok

takok tamakokji junga meshitettsü, saka küm 10-20 lir ang chichiba takok tamakokji bendangtsü', ta pai ashi. 'Kodang nai ne sasa noktakteta tangar teyari medeni jaja-a odir, idangjiang shitakba takok angubaji jangjatsü, anungji, küm talangka atema bilema invaktsüla'. ta paisa shisem.

Tanü alima ya reprangdangra
oset tapu aika ya yimyaliba
(natural) masü mözümera
amshia yangluba (synthetic)
teimba angutsü, kechiyong
yimyaliba osettem kanga apara
küмого aser synthetic osettemji

NAGALAND POLLUTION CONTROL BOARD

Signal Point, Dimapur – 797112, Nagaland
Tel.: 03862-245727, TeleFax: 03862-245726

Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBÄ JENJANG

Sl. no	City	Location of air station	Type of area	Monitoring dates		Permissible limit As per the National Ambient Air Quality Standards “Iba tasazük alemabo metudaktsütsila”
				02.04.2025	04.04.2025	
1	Dimapur	Bank Colony	Residential	160	178	100 µg/m ³
2		Dhobinala	Commercial	192	187	
3		NPCB Office, Signal Colony	Residential	161	164	
4		Tenyiphe, Chumoukedima	Commercial	138	137	
5		Nagarjan	Residential	154	129	
6		Viola colony	Residential	128	139	
7		Burma camp	Commercial	168	192	
				01.04.2025	03.04.2025	05.04.2025
8	Kohima	Opposite NST Office	Residential	114	80	75
9		PWD Junction	Commercial	123	127	146
10		High School Junction	Commercial	199	171	176
11		Midland (Upper)	Residential	113	122	123

Iba osang ya nübortem ajangzüksü atema Nagaland Pollution Control Board-i agütsür.

PM Modi-i Dubai Crown Prince, Sheikh Hamdan den senden amen



New Delhi, April 08, 2025: Mongolbarnü New Delhi nung Ato kilonser, Narendra Modi aser Dubai Crown Prince, Sheikh Hamdan bin Mohammed bin Rashid Al Maktoum na senden amendang tangokba noksa nung angur.

New Delhi, Rongchii/April 08 (Agencies): Thailand aser Sri Lanka na semdangba sülen Mongolbarnü New Delhi nung Ato kilonser, Narendra Modi-i Dubai Crown Prince, Sheikh Hamdan bin Mohammed bin Rashid Al Maktoum den senden menogo.

United Arab Emirates (UAE) nungi lenir Sheikh Hamdan den senden amenba sülen Ato kilonser Modi-i, Dubai prince-i India semdangba ajanga linük ana tsüngda tesendaktep tajungba akümtsü atema lenmang lapoktsüogo, ta metetdaksü.

Modi-i X ajanga, "Dubai Crown Prince Sheikh Hamdan bin Mohammed bin Rashid Al Maktoum ajuruba atema pelar. India-UAE Comprehensive Strategic Partnership tejakleni aotsüsa Dubai-i tongtimbang shilem agiogo. Pai semdangba ya ajanga linük ana tsüngda tera junga yanga aliba kuli sayur aser

tarutsü nung ano taliba amalitepa inyaktsü atema lenmang lapoktsür," ta metetdaksü.

Prince Sheikh Hamdan-ia UAE-India tesendaktep tajungba akümtsü atema inyaktsü, ta ashi.

Sheikh Hamdan-i X ajanga, "Tanü New Delhi nung Ato kilonser Narendra Modi ajuruba atema pelar. Künati UAE-India tesendaktep ano tajungba akümtsü atema jembio," ta metetdaksü.

Ano külen Defence minister Rajnath Singh-ia Sheikh Hamdan den temeja senden ka amenba sülen Rajnath-i, India-i Gulf nung aliba linük den defence sector nung amalitepa inyaktsü yongyar, ta metetdaksü.

Paisa, region nung yimjung aser azükaru atema India aser UAE napronglai inyaktsü, ta ashi.

Defence minister Singh-i,

"Crown Prince of Dubai, Deputy PM aser Minister of Defence of UAE, Sheikh Hamdan bin Mohammed bin Rashid Al Maktoum den New Delhi nung senden tajangzük kaa menogo. India atema UAE den Comprehensive Strategic Partnership ya kanga tongtimbang," ta metetdaksü. Singh-isa, "Tarutsü nung onoki defence tsütsü amalitepa inyaktsü, production aser terenlok projects, innovation aser technology sector nung amalitepa inyaktsü yongyar," ta metetdaksü.

External Affairs Minister, S Jaishankar-ia Dubai Crown Prince ajuruogo.

India-i UAE den commercial, sobaliba aser nüburtsem tsüngda tesendaktep yangluba nung Dubai-i tongti shilem agiogo. Tang UAE nung India nung million 4.3 shi lir aser parnok teimbaka Dubai nung mapa inyaktertem lir.

Waqf Act anemba state temi linük temzüng mezüngmeshir: Trivedi

New Delhi, Rongchii/April 08 (Agencies): Jammu & Kashmir Assembly nung Waqf bill anemba aija BJP MP, Sudhanshu Trivedi-i, Jammu & Kashmir aser Tamil Nadu ama state temi Parliament nung agizükba ozüng anema nokdakbaji ajanga parnoki linük temzüng mezüngmeshir, ta aitsü.

Osangbenertem den jembidang Trivedi-i, "Waqf Bill ya inyakyim shidak benshia agizük aser temzüng kübok iba ozüng agizük. Ajisüaka iba ozüng anemba state tem lir. Tamil Nadu state sorkar süaka Jammu & Kashmir sorkar süaka iba ozüng anemba ajanga parnoki linük temzüng mezüngmeshiba sayur," ta metetdaksü.

Paisa, India temzüng kübok Parliament nung agizükba ozüng ka anema nokdaksü atema state sorkartem dak tashi mali, ta ashi.

"Linük temzüng kübok, Indian Parliament nung agizükba ozüng kaji state sorkartemi anemtsü makok. Jammu & Kashmir Assembly nung atalokba ama, parnoki ibaji shisa indokra, iba tetezü item nisungtem ket nung linük temzüng lendong nung lir," ta pai ashi.

Ano külen Congress MLA, Irfan Hafeez Lone-i, Congress-i Waqf Amendment Act anema nokdaker, kechiyong iba ozüng ya secular aser federal anema lir, ta ashi.

Paisa, Waqf Amendment Act ya linük temzüng, democracy aser ozüng anema lir, ta ashi. Jammu & Kashmir Assembly nung National Conference aser parnok den teloktep party tem nungi MLA temi Waqf Amendment Bill anema longkak aita rongrong adoka liasü.

Assembly senden tenzükli opposition MLA temi Waqf Act atema o lemteptsü takhangba agütsü, ajisüaka Speaker Abdul Rahim Rather-i temelaba magütsü.

Parliament House anaprongla nung iba bill agizükba sülen April 5 nü linük Tir, Droupadi Murmu-i Waqf (Amendment) Bill, 2025 agizük iba Bill ya Act kümogo.

April 4 nü Rajya Sabha nung Waqf bill pusema agütsüba vote 128 liasü aser iba bill anema agütsüba vote 95 liasü.

Lok Sabha nunga iba bill atema mapang talangka o entepba aruba sülen züngsem 288-i iba bill pusema vote agütsü aser iba bill anema vote agütsür 232 dang liasü.

Amit Shah leniba nung J&K nung terenok projects asadang



April 08, 2025 nü Srinagar nung Union Home Minister, Amit Shah leniba nung ketdangsertemi Jammu & Kashmir nung terenlok projects balala asadanga senden amendang tangokba noksa nung angur. Kasa noksa nung Jammu & Kashmir Lieutenant Governor, Manoj Sinha-a angur.

Srinagar, Rongchii/April 08 (Agencies): Mongolbarnü Srinagar nung Union Home Minister, Amit Shah leniba nung ketdangsertemi Jammu & Kashmir nung terenlok projects balala inyakba asadanga senden tenzükogo.

Raj Bhavan nung ayongzükba senden nungji Jammu & Kashmir Lieutenant Governor, Manoj Sinha aser Chief Minister Omar Abdullah na den Union home ministry aser Jammu & Kashmir nungi tongti ketdangsertem adener.

Senden nungji ketdangsertemi J&K Union Territory nung terenlok mapa balala inyakba osang home minister nem metetdaksütsü.

Hombarnü nungi tenzüka Shah-i anogo asemnü Jammu & Kashmir semdang.

Hombar nikongdang Shah

Srinagar tonga aoba sülen pai Kirti Chakra award angusang, Deputy Superintendent of Police, asür Humayun Muzammil Bhat'er ki semdang. 2023 küm kiralongrartem den raradang pa asü.

Shah-i minute 20 shi Bhat tebu, retired Inspector General of Police Ghulam Hassan Bhat den sensaksema amenba sülen Raj Bhavan-i ao.

2023 küm September ita nung Kashmir nung Anantnag district kübok Gadool yimdak arem nung kiralongrartem den khatepdang Bhat densema sepai pezü asü. Iba sülen Bhat nem Kirti Chakra award agüja liasü.

Nikongdang Union home minister-isa sepai aser police tongti ketdangsertem ajurua Kashmir nung security tensa asadango.

Bendanglen nungi anguba fund küm 4 tsüngda amshitsüla: MHA

New Delhi, Rongchii/April 08 (Agencies): Foreign Contribution (Regulation) Act, 2010 dak sendakba nung Centre sorkari, bendanglen nungi senotsü teyari anguba melungtet telok ajaki bendanglen nungi anguba senotsüji küm pezü tsüngda amshitsüla, ta metetdaksü.

Ministry of Home Affairs (MHA)-isa, FCRA kübok register süa alirtemi jelía temelaba meshiba sülen bendanglen nungi senotsü agizüktsü akok, ajisüaka iba temelaba anguba sülen nungi tenzüka bendanglen nungi

senotsü agizüktsü atema 'validity period' ji küm 3 asütsü, ta metetdaksü.

"Shia aliba mapang telatet süir külen sen agizükba mesüra senotsü amshibajibo FCRA, 2010 ozüng alema inyakba ama züngshitsü, aser aibelenertem nem temerenshi agütsütsü," ta MHA sangdong ajangasa metetdaksü.

Tamalenbo bendanglen nungi anguba senotsüji agizüktsü aser amshitsü atema mapang telatet kecha maliasü.

Ministry of Home Affairs nung tim ketdangsertemi kuli balala apir associations mesüra

organization nem 'validity period' mapangji atsülangtsütsü akok, ajisüaka iba atema telatetji kechisa asütsüar parnoki memetetdaksü.

FCRA, 2010 kübok register süa malirtemi sobaliba, rongsenkettsüng, shisaliok, yimsü dak sendakba mesüra loktiliba sentongtem atema MHA dang jelía temelaba meshiba sülen bendanglen nungi senotsü teyari agitsü akok.

Item ama sentongtem atema jelía temelaba meshidang kechi sentong asoshi mesüra kechi project atemaar tejangja metetdaksütsüla.



April 08, 2025 nü West Bengal kübok Muslim nung nütsüng aika aliba Murshidabad district nung Muslim nungertemi Waqf Act anema longkak aitdang tangokba noksa nung angur. Iba district nungbo longkak aitertemi police dak long onloktsü aser gari kar rongdokja liasü.



TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 09, 2025

Lenmangyangluba reprangertem

Koba lima nung südir süaka nübortem jajatsüba gari lenmang yabo government-i yangluba dang masü saka yanglur külena lenmang tamajung mekümdaktsüi tanen maka anepalutsüba jia government mapa lir. Ibaji mapa tulu aser kanga tongtibang asüba agi central government nung Ministry of Road Transport & Highway ta, aser state nunga PWD Road & Bridges ta nungja balala agütsür engineer aser overseer-tem nungi shir lenmang aser kilentzü ooka inyakertem tashi shima ita sen dalam agütsür inyakdaktsür. Aji oda, lenden nung dang masü saka lungren longpang aser ayong tulu dena ajanga gari jajatsüsa tazung tashitemeteter engineer-temi lenmang aser apu noksa tejangja yanglur külenang, item noksa nung aliba tasazük aser osettem shitak amshia inyakertemi machine tapu aika amshia lenmang yangluba nung gari nung mener jajabaji, tzü manung rong nung mener aoer ama, tatashia memetet, gari toudak nung marok nung süngo züka jema oteter aser computer nung mapa inyaka jajateter. Ibaji tanga lima nung dang masü asen lima nunga takoktsü, ajisüaka tangbo makoker, kechiyong asen lima nung, tesasatsüka, lenmang yanglurtemi lenmang junga meyanglur. Ibayongji, tenemtsüng lenmang yangluba yabo junga yangludaktsütsü asoshi Foot Hill Road Co-Ordination Committee purtemi government aser contractortem den kanga nungsen agitepa jembiba angashir aser mapang mapang shia lenmang reprangdanga jajaba angur. Ibaji dang masü saka parnokibo lenmang yanglutsü asoshi Delhi nung senotsü bushiba maparentem nunga state government den yaritepa inyakba angashiogo. Yimkong jajatsüba lenmangsa süaka yamaji pei kija jajatsü lenmang amato bilema temulung agüja inyakba agi tang tesem tesem nung Foothill lenmang tupoka inyak tenzükogo. Aji oda, Nagaland nung Naga nungertem dak tangatetba tajung ka reprangtetsü, tangbo Foot Hill Road Co-Ordination Committee purtem kisüng masü saka pei pei lushi nungbo MLA aser lokti tentettemia mapa inyakdak tonga-tonga oagi mapa shitak inyak meinyak mita reprangba angur. Atangji, government nung lenmang yangluba mapatem reprangtsü asoshi shimba ketdangsertem peria lir ser nung, lokti tentettemi dena reprangtsüsa akümbaji PWD (R&B) aser National Highways nung ketdangser engineertem asoshi tebilemdangtsü mapa ka asütsü. Aji oda, lenmangbo yanglur saka yangluli raksar, kasa National Highway-sa süaka asen lima nung tilaba yangluteter, ano tesem kar nungbo lenmang dang nungi kilentzü tekaba ser yanglua angur, aji dang masü saka tesem aika nung motzü aolen mali lenmang lendi nung yimtaktsür. Aji oda, Nagaland nungbo lenmang merenemdang lenzünglenbo raksar atar. Ibaji department nung inyakertemi lenmang yanglu mashi asü ? Mesüra contractor-temi long aser bitumen shitak amshia meyanglur asü ? Mesüra ali ochimashi asü ? Mesüra Nagaland nung lenmang yanglurtem dak pei lima aser nübortem meimba shisatsü dang nungibo sen meimba shisatsüang tuluba dena ali ? Atangji, lenmang kiburji nübortem lir, anungji nübortemi repranga yangludaktsübaji tim, ajisüaka department nung alirtem dak temulung alemba agi aser contractor-tem dak mapa shitak junga inyaktsü tangatetba aliba agi, nübortem lenmang yangluba maparen repranga jajaba nung nübo, rongsen aser mapang meindoktsüsa tensa mapang ka asenoki yanglutetlasang, iba jagi koda Nagaland topur junga yanglutetla. Nagaland topur junga meyanglutetba ya sen makaba agi masü aser teinyaker maliba agia masü saka ochi aser pei lima aser nübortem meimba shisatsü agi anüngba ajanga lir. Asenok dak ochi aser nübortem meimba shisatsü ali nungbo, asen ki dang nungibo yimkong lenmang tajungba yanglunütsü aser lenmang mashi mashi yanglur tajangzük tulu agitsü memerangtsü. Atangji, sarusachi meshir onsara nungji timtema aika ajangshia alitsü saka Nagaland nung gari lenmang junga meyanglutetba yabo sarusachi onsaraba agi masü saka ochimashi uluraba agi meyangluteter südi !

OLEMSABANG

MOLUNGKIMONG LITERATURE BOARD-i ZÜLUBA: OSEMLOK

~ Rev. Tamsü Imchen

Naga church 1872 Dekahaimong (Molungkimong) yimdak tenzük kum 100 ajungba jelia renem sentong aser arogo tenzük baji tzü nung baptiba dak ajemdaktsü ta renemba kuli yamai shia lir.

CENTENNIAL JILIA RENEM SENTONG OSANG

AO BAPTIST CHURCH

1872-1972

1967 - AROGOTEM ASÜNGSASHIBA

1968 - AO LIMA KHRISTA ASOSHI

1969 - AROGO YANGLUSHIBA

1970 - KHRISTAN KÜTTANGSUBA

1971 - OSANGTAJUNG TENYABA

1972 - CENTENARY

ABAM Centenary Amongtsü Special Committee Report .

By Ngangnen, Impur Memo No. ABAM/64-65/ Dated 29/10/1965.

Part (ii), (iii) nungi agiteta zülur:-

Ao lima nung arogo kodang tenzük ?

Ans:- Dr. Clark Dekahaimong Dec 18, 1872 atong, aji American Baptist Missionary Ao li nung mezüng tetsüng ajemokba liasü. Dekhahaimong tonger anogo 5 nu buba Deobar nu December 23, 1872 Baptiba sentep ka liasü aser panuji nisung 15 tashi Dr. Clark i baptitsü. Iba selen Kibuba benjung aka, aser nikongtsütsüji sarasadem sentep liasü.

Saka kum ka jilia 1871 nungi tenzuka Dec. 18, 1872 tashiji Naga nunger dang Khristar Osangtajungji sayutsü atema Sayutsüngir ana asem tashi agi, temulung meyipa Khristar teküzmük agizuka baptitsü, Godhula o tebutzü den Dr. Clark atua sayutsüngitsü merangba indang khuli tejangja sayur. Shirnok iba anogo matongdang baptia ali parnok ajakji Sibsagarh nung aliba arogo nung member yua liasü. Dekhaimong nung nisung 9 lua iba anogo tashi Sibsagarh arogo nung dang liasü ta tezüluba nung khuli tejangja angur. Kechiyong tesulenang parnok tenungji bener atua Naga arogo nungji ayu. Anungji Khristan tamang maparen (Doctrinal View) nungi kodang jembidir, Baptiba anogoji AROGO TENZÜKBA ANOGOJI lir. Anungji item kuli yagi Dec. 23, 1872 anogoji Aoli (Ao Soil) nung mezüngbuba arogo tenzük ta jangjatsür.

Dekhaimong nung arogo ka liasü ta Assam Mission statistics 1876 station aser Churches BMM 1877 page 217 Vol. LVII nung Assam Baptist Arogo 12 rong nung Haimong arogoji ka ta tejangja angutsü. Dr. Clark-i November 18, 1873 nung Dr. Murdock dangi züluba shity nunga ibai lir. Aji sur Khari nungeri Molong nunger alep nung, tzüsener rogotem jagi oa Khari nunger ka leper aru nung arogo nungi atsüngtsü. Aji sur külenang Clark Sahib-i züluba shity nungji Godhulai Dekahaimong nunger tamangertem tia indang alua pa dang ashiba osang angutsü.

Osangtajung (yimsü) aitbaji Arogo tenzükba den kasa masü ta aseni angatetdi. Anungji Khristar Arogo kimong tenzük baji Dr. Clark-i Ao linuk nung baptitsüba anogoji alitsü. Iba khuli tali jangjatsü atema tangar lima nunga Centenary amongba yimya ka yangi sayur. Burma lima Sesquicentennial 1813-1963 among report nung F. G. Dicsasoni yamai agütsür, "U Nau was baptised and the young Burmese Church had its beginning." Ano Robert G. Torbet-i ashir, "On June 27, 1819 Nau was baptized. Thus began the Protestant Church in Burma." Anungji Burma nung Arogoji mezüng baptiba nungi anogoji tenzuka azüng.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Osangtajung Yohan kaket nung shia aliba atsüki ngutetogo



Church of Holy Sepulchre nung ali tua bushisüngdang, Sapienza University of Rome nungi archaeologist tem noksa nung angur.

April 08, 2025: Church of Holy Sepulchre nung archaeologist temi ali tua bushisüngdangba ajanga osangtajung Yohan kaket nung shia aliba atsüki ngutetogo.

Osangtajung Yohan kaket nung shia aliba atsüki ya Yisu Kangki nung metaba aser Yisu aremba leper na tsüingda lir.

Calvary aser Yisu leper na tsüingda tepilaji metre 45 shi dang lir.

Yohan 19:41 nung yamai zülua lir, "Tang Pa kong Kangki nung angenlok, yangji atsüki ka liasü; aser atsüki nungji ano nisung kodanga meyudangba leper tasen ka liasü."

Iba tesem achaayangtsü lemezüksüba Armenian aser Greek Orthodox Arogotem den Roman Catholic Arogoi Aso 19buba mapang yangluba Tenla ki atem yanglushitsü atema melungba sülen ali tua bushisüngdangba project ya 2022 küm tenzüka liasü.

Iba tesem nungji ali tua samples tendangba ajanga küm 2,000 tejaklen iba tesem nungji olive süngdong aser tsükmenatsü tezü aliba jangjaogo.

Iba project lenir, Professor Francesca Romana Stasolla-i, "Archaeobotanical ajanga onoki jangratsüsa langka bushitetogo. Osangtajung Yohan kaket nung

Küm 10 tsüingda SE Nigeria nung Khristan 20,300 tepsetogo

Yaoundé (Cameron), April 08 (Agencies): 2015 küm nungi tenzüka tanü tashi nung South East Nigeria nung Khristan 20,300 tepsetogo, ta osang ka ajanga metetdaksü.

Khristan melungtet telok International Society for Civil Liberty and Rule of Law (Intersociety) indang report ajanga, Khristantem jenti tepsetbaji talisa Jihadist Fulani telok, Niger Delta jihadist telungpurtem, Jihadist Fulani auertem aser Fulani Muslim teloktemi lir, ta metetdaksü.

Intersociety Board Chair Emeka Umeagbalasi-i sign süa aliba report nungji yamai shia lir, Muhammadu Buhari yimsüsüba mapang nung Nigeria telungi aitertem, talisa South-East Nigeria telungi aitba Jihad teloktemi 2015 küm nungi tenzüka tanü tashi nung Khristan 9,800 shi tepsetogo.

Iba dak alia Nigeria Armed Force sepaitem aser ketdangsertemi 10,500 shi tepsetogo, aser ibaji talisa yimsü aser kin nung ajemdaker inyakba lir, ta report nungji shia lir.

"South-East Nigeria nung alirtem aika nem tai tongloksür aser kin o yimsü nung ajemdaker parnok aitsü," ta report nungji shia lir.

Intersociety-isa, Anambra

State nung tamanger 40 shi ita 3 dak tali detention facility (State Militias' Lion House) nung pua lir; shidakba agibo ozüing kübok anogo 60 dak tali pua mayutsüla, ta metetdaksü.

Iba dak alia parnok anema kuli magütsüteter, anungji sorkari tang tashi parnok pua ayutsü temeden mali, ta report nung shia lir.

Igbo li nung Khristantem jenti tepsetba atema Intersociety-i anüdoklen aliba state pezü- Enugu, Anambra, Ebonyi aser Imo nung Governor tem aitsüogo.

Sensotem aser kiojentem kümzüka meyetetbaji Governor tem jagi Nigeria sorkar aser telok kar den amalitepa inyakba agi lir, ta report nung shia lir.

Item state tem nung jihadist Fulani teloki Khristantem jenti tepseter, ajisüaka ketdangsertemi ibaji nokdangtsü atema kecha meinyaker, ta report nung shia lir.

2015 küm nungi tenzüka 2021 küm tsüingda item state pezü kübok Local Government Areas 78 nung tensa kanga mejungi kümogo. Item regions nung talisa Trado-Judeo Khristantem tepseter, ta kasa report ajanga metetdaksü.

Intersociety-i, tang teinyakdak Governor pezüji

ANO GO ABEN TSÜNGREM DEN

Khristan libaliro tetenzükdak
Mathi 4: 18-25.

Meimchir temetetba nung Nazaret nunger Yisui yaribaji meimchiri rasaa ashitsüba atema yari. Asenoki Yisu indang bilembaji Talangzüker aser Kümtetdakba ta angatetba nung dang atemer. Pa aji liasü, saka ano iba dang tali.

Tanga balaka rongnung, Yisuji mapang ajak nung liba-liro tesayur tulu ka liasü. Yisui tebilemba ka mesüra tangatetba ka nung dang Pa asoshi aser tanger asoshia tekong meranga mesot, Pai ajak asoshi jakla (morality) nung sot. Yisui ajaba odang lir: "Ni anidakang". Iba tajaba nung tashi angatsü asoshi shidak bilemtsü aser shidak alitsü temeshi tebilemtetba nüngdaker. Iba nung Khristan kati Khristan jakla tashi angur.

Telok nung jenjang akatsü asoshi Yisu sayuba liba-liro yimya ozüingji kija takümi amshitsüla. Alima nung rongsen meshidaki lemsatepba nung ni kechi inyaktsü? Ajemrepa alirtem tsütsü Kü tebilemba kechi? Yisui "Kü sülen anidakang" ta ashiba tetezü kechi?

Item nung shisadangang: mapang agia Mathi 5:1-22 züingang. Iba liba-liro ozüing ner telok nung, ne mapa nung, ner arogo nung aser ner kidang koda amshitsü bilemdangang. Nai iba tesayuba nung alitsü meranger asü?

Sarasadem: O Kibuba, ne leman Kü dang sayuang, aser ni lenten leman nung aniang. T.Ken 27:11

Koba leman nung na aotsüla iba lemanji atema ni ne dang ashitsü aser sayutsü: Ni Kü tenük ne dak yur sayutsüngitsü. T.Ken 32:8.

Muslim nunger kati kinüngtsüi
Khrista agizükba atema tsüingset

April 08, 2025: Uganda nung Muslim tsür kati Khrista agizükba atema la kinüngbui la tepsettsü ta tsübua liasü, ajisüaka lar medemla jagi la dang kotari amshia la tsüingset, ta osang ka ajanga metetdaksü.

Tanur trok tetsü jagi March 21 nü Yisu Khrista agizükba sülen March 23 nü mezüing Tenla kidangi oa tekülem sentong nung dena liasü. Muslim nunger Ramadan benjung mapang nung lai Khrista agizükba atema la kinüngbui tejashi nung la tsüingset.

Anüdoklen Uganda kübok Busembatya jila nung arrshi küm 41, Nasiimu Mirembe den lar medemer kati Khrista osangtajung lemsatepba sülen lai Khrista agizük.

Lar tanur trokji arrshi küm 3 nungi 18 tsüingdapurtem lir.

Mirembe-i Khrista agizükba sülen March 23 nü la Tenla kidangi aoba mapang nung Muslim nunger kiyonger, Awudu Mbulalina-i la Tenla kima anasa ajurua la den jembia liasü.

Kiyonger jagi la kinüngbu dang la Tenla ki tsütsüleni oa angu ta ashitsü aser la

kinüngbui la tepsettsü ta tsübua liasü, ajisüaka lar medemla jagi la dang 'Tsüingrem dak dang tamang akatsüla' ta shia Tenla kidang jagi anir ao.

Tekülem sentong tembangba sülen tena kidangi meyipa aoba mapang tenati Mirembe kinüngbu, Adamu Mukungu ajuru.

Idangjisa pai la kinüngtsü dang, "Na Tenla kidang nungi aluba ni nguogo. Nai kechi inyakogo, iba ya kanga majung, talisa Ramadan mapang nung iba ya kanga majung," ta ashi.

Iba sülen pai kinüngtsü dak ama aser kotari ka agiteter la dak aiben atsüing.

Arogo nung züingsemtemi la clinic kati anir ao saka ghonda ana tsüingda la tamajungba akümiba agi Bugiri nung aliba hospital kati anir oa yari. Ajisüaka la mekümzükteti March 24 anepdang 3:45 ako nung süadok.

Mirembe kinüngbuji jena oadokogo aser police-i pa bushi tenzükogo.

AO OSHI ANGAZÜKDAK:**TANÜ ANGAZÜKTSÜBA OJANG****Temeim**

(adj) aria bilem, yarinüba shisatsü (love)

* Tsüngrem temeim agi asenok kümzük.


Temeimer

(n) kang meima bilemer nisung, tetongtechi (lover)

* Temeimer den temulunglemtepa alitsüla.



Tir Yimyim

OLONG PAITEP # 7117**TIPIEN**

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümli nungi pilar

OLONG PAITEP # 7116 TELANGZÜBA**TIPIEN :**

1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA

Andhra Pradesh nung lisopur kaketshir 20,000 shi kati 108 Surya Namaskarams aiba ajanga Guinness World Record ka yanglutetogo. World Health Day tenüng nung Araku Valley Degree College nung 'Yoga - Maha Surya Vandanam' agidang tetsür 13,000 tema dena kaketshir 20,000-i ghonda ana tashi 108 Surya Namaskaras ia liasü.

Dec 31 tashi nung Jorhat-Dibrugarh NH mapatong renemtsü**Guwahati, April 8, 2025**

(Agencies): Assam nung National Highway Jorhat-Dibrugarh section taküm küm renemtsü ta Chief Minister Himanta Biswa Sarma-i metetdaksü.

Lok Sabha elections matongdang December 31, 2025 nung iba lenmang yangluzüksü ta pai ashi.

CM Sarma-i April 7 nü New Delhi nung Infrastructure Development Corporation Limited (NHIDCL) Managing Director Dr. Krishan Kumar den

senden ka amenba sülen iba osang metetdaksü.

"Elections matongdang nübor tsüngdang nangzükba ama lenmang yangluzüksü" ta pai ashi.

Chief minister Sarma aser NHIDCL Managing Director Dr. Krishan Kumar nati Assam nung mapatong teinyakdak osang lemsatep.

Tenati Brahmaputra River nung 19.28-km-long four-lane bridge yangluba meyipa reprangshi. Iba apu ajanga Assam kübok Dhubri-i

Meghalaya kübok Phulbari den sendakteptsü aser renemba sülen India nung apu talangtiba akümtsü.

Tenatisa Rs. 25,000 crore Guwahati-Silchar Expressway indang lemsatep aser iba ajanga Assam nung tongtipang yimti ana tsüngda senzusenbongba mapa ajema akümtsü.

Sarma aser Kumar nati Baihata Chariali-Tezpur aser Gohpur-Kulajan tsüngda national highway corridors aser Numaligarh-Gohpur underwater tunnel indang lemsatep.

CDPO ka ket nung pa dak malang rongsenba rongsen aliba atema apu**Guwahati, April 8, 2025**

(Agencies): Chief Minister's Special Vigilance Cell-i Debitola nung Child Development Project Officer (CDPO) Surjya Baruah puogo.

Baruah ya Kokrajhar district kübok CDPO inyaker aser pa sen tarulen dang nungi teimba rongsen bendenba atema tai tonglokja apu.

Vigilance Cell-i Hombarnü NS Road, Dhubri nung Baruah'er

para ki ajungbena mita aoba sülen pa puogo.

Yashi nikongdang 4:00 ako meta nungi bushisüngdang tenzük aser asüngdangya asüba den külemi tongtipang kulikaket aika ngutetogo.

Par ki mita reprangba sülen Baruah Guwahati-i anir ao ano asüngdangyaogo. Ochimashi aser senotsü tim mesüi amshiba atema mapang talangka bushisüngdanga aruba sülen pa

apu.

January 20, 2025 nü Vigilance Cell-isa Guwahati kübok Jayanagar aser Bhangagarh nung Baruah'er kitem mita ao.

Iba mapang Rs 45.77 lakh, hon 10 tolas tema, gari tajung pezü, .32 caliber pistol ka aser bank dak sendakba taitüsü aketba kulikaket aika nguteta liasü.

Vigilance Cell-i Baruah'er rongsen ajunga metettsü atema bushitepdar.

Meghalaya nung Principal Secretary ka Uzbekistan nung asü**Guwahati, April 8, 2025**

(Agencies): Meghalaya nung PWD (R&B) aser PHE department tem Principal Secretary Syed Mohammed Andaleeb Razi kanga dang ajungbena Uzbekistan nung süogo.

Razi ya nija mapa ka atema Bukhara nung oa liasü aser hotel nung lia temulung nung timtem adokba sülen asü.

Anepdang pa nungi telangzüba kecha maliba agi hotel staff-i pa anenzükba takdang nung kishi kakkoker atudang pa sür lia angu ta osang angazüker.

Razi ya Indian Railway Traffic Service (IRTS) ketdangsür ka liasü aser 2021 nungi Meghalaya nung deputation nung inyaka aru.

"Principal Secretary, GoM

Syed Md. A. Razi, IRTS ajungbena asüba osang angashia temulung raskar. Pai inyakba department ajak nung kanga nendaka aser tenangzükba tajung yur inyaka aruogo. Pai mapa ajak kanga bendanga agüja inyak aser iba ajanga pa den külemi inyaktertem ajungmesoa liasü" ta Chief Minister Conrad K. Sangma-ia metetdaksüogo.



Manipur Governor Ajay Kumar Bhalla-i April 8, 2025 nü 11th Governor Rally aser Rajya Puruskar Award Distribution Ceremony nung adendang agiba noksa ka angur. Iba sentong ya Manipur State Bharat Scouts and Guides-i Durbar Hall, Raj Bhavan nung ayongzüka agi aser Governor Bhalla-i Scouts 30 nem Rajya Puruskar Awards agüja liasü.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND, KOHIMA
INFORMATION

Dated, Kohima, the 3rd April, 2025 NO.DESE-9/02/2021/356: Trainees who have undergone training at various Govt. Industrial Training Institutes, in Nagaland, for the period 2023-24 (i.e 1 year course 2023-2024 and 1st year of 2 year course 2023-2025) are hereby informed to apply in the CTSS portal (<https://serviceonline.gov.in/directApply.do?serviceId=2600>) for availing Stipend, starting from the 15th April, 2025 to 15th May, 2025. Further, trainees who are unable to apply in the above portal may contact / visit their respective Institute for registering in the portal. Failure to apply in the portal at the stipulated time, the concerned authority will not be held responsible.

Trainees of 2nd year of 2 year course (2022-2024 sessions) need not apply in the portal as they are already registered.

Required Documents for registering in the portal;

1. Passport size photo.
2. Front page of Bank Pass Book
3. Govt. ITI Identification Card.

Sd/-
SAVIO VISA, Director.

South Korea nung June 3 nü tir election agitsü



Han Duck-soo

Seoul, Rongchii/April 8 (Agencies): South Korea nung Yoon Suk-yeol temelen shimtsü atema tir election June 3 nü agitsü, ta linük acting tir-i metetdaksü.

Martial law mapang tatsüka atema benokba sülen Yoon Suk-yeol ya mapa nungi anentsü aser iba ajanga election agitsüsa kümogo.

Ato Kilonser Han Duck-soo, shiba acting tir lir pai Mongolbarnü ashiba agi, election kecha tetsükdaksü makai agitsü aser renemshitsü atema political party tem nem mapang peria agütsütsü atema sorkari iba anogo election agitsü telemteba agiogo.

Han-isa, sorkari iba ken o ya National Election Commission aser ken o dak sendaka aliba tanga agency tem den sensaksemogo, ta ashi.

South Korea indang Constitutional Court-i Hokolbarnü Yoon mapa nungi anentsütsü atema telemteba agia liasü, shiba 2022 küm, küm pongu atema shima liasü. Conservative lenir yagi taoba küm martial law benoka tir tashi alia amshiba ngutetba sülen pa mapa nungi anenja liasü.

South Korea temzüng ozüing

kübok tir mapa nungi aginba sülen anogo 60 tsüingda election agitsüla ta shia lir.

Yoon-i December 3 nü martial law sangdongba sülen South Korea nung mepetmesü tulu adok. Linük anema nokdakba tashitem nokdaksü atema martial law benok ta Yoon-i shia liasü.

National Assembly nung sepaitem aser MP tem aser parnok nem teyari agütsürtem tsüingda mangatettep adokba ajanga taoba mapang military dictatorships kübok timtemtepba bilemtetshidakja liasü. South Korea ya 1987 kümang democracy dangi meyipa liasü.

Yoon-i martial law benokba sülen ghonda ishika dang lir agina liasü. National Assembly-i iba anema vote agütsüba sülen agina liasü.

Democratic Party nungi Lee Jae-myung-i taruba election akoktsü imlar. Pa ochi mashi ken o aika nung aitsür liaka pai iba election akoktsü imlar.

Election magi tashi Han lenisüba nung South Korea maneni inyaksangshia atatsü, aser iba ajanga linük mepetmesü nung aliba tembangdaksütsü imlar.

Iran aser US na Oman nung nuclear atema sensak asemtsü

Theran, Rongchii/April 8 (Agencies): Iran-i ashiba agi, parnok indang nuclear programme dak sendakba nung United States den sensak asemtsü. Iba ajanga taoba mapang tir Donald Trump-i osang agütsür aliba jangjatsüogo.

Iran Foreign Minister Abbas Araghchi-i social media nung Hombar aonung, Honibarnü "indirect" sensaksem akatsü ta shiogo. Iba sülen Iran state media-i, Oman-i achaayanga Araghchi-i Middle East dangi US envoy Steve Witkoff den ajuruteptsü, ta metetdaksü.

Taoba mapang Trump-i, Iran den indang indanga sensaksem tenzükogo ta shiogo aser kasa mapang nung US-i Iran amaksü akok ta tekümdangtsü metetdaksüogo. Tehran-i taoba mapang Washington-i sensaksem atema ayongzükba magizüki liasü.

"Onoki Iran den indang indang sensaksem dar. Honibarnü sensaksem tsü. Onok senden tulu ka amentsü lir aser kechi atalokdir repranga atati," ta Trump-i Hombarnü White House nung Israel Ato Kiloner Benjamin Netanyahu den külemi osangbenertem den sensaksemba mapang ashi.

"Tenangzüktepba yangluba ya tajungba asütsü ta ajaki bilemer ta amanger," ta pai shisem.

Trump-isa, nuclear dak sendakba nung parnok tejangraba azüoktsü atema sensaksem ajanga mekokra Iran lendong tului aitsü, ta ashiba den Theran ket nung nuclear weapons malitsüla ta ashi.

Iba ita tetenzüklen Trump-i NBC News dang ashiba agi, "parnoki (Iran) tenangzüktepba meyaglura bomb pokloksütsü."

Paisa, parnoki kodanga

majangshidangba ama bomb pokloksütsü, ta ashi.

Tehran den indang indanga sensaksem tsü Trump-i sangdongba ya Netanyahu tejangraba amabo masütsü, shibai Iran nung bomb dang pokloksüner, ta Al Jazeera indang senior political analyst Marwan Bishara-i ashi.

"Trump-i mapang talang ka nungi tenantzüktepba ka yangluner," ta Bishara-i ashi. Ajisüaka taoba küm Israel-i anüing ajanga amakba sülen Iran indang defences tashi mait kümdaksüogo, ta Netanyahu-i bilemer, aser pai iba ya US teyari agia Israel-i Iran tembangtsütsü atema maongka tajungka ta bilemer.

"Trump-i Iran den meraratepner, kechiyong pa tang alima ajunga den shishilembaba tsütsü rara nung lir," ta Bishara-i shisem.

Trump-i taoba ita Iran lenir Ayatollah Ali Khamenei dang linük ana tsünda sensaksem tsü imlaba lemsatepogo.

Hopta tatemi Araghchi-i, indang indang sensaksem tsü ya kecha nüngdak madoker ta shiogo.

Tehran-i, parnok nuclear weapon yanglutsü kecha tebilemba mali ta shia arudar aser Washington-i indang indang sensak asemtsü atema jaokba magizüki arudar, saka parnoki indirect sensaksem tsü mulunga lir ta shiogo.

Iran media sangdong balala ajanga Mongolbarnü ashiba agi, Oman indang Foreign Minister Badr Albusaidi teyongtsüi ia sensaksem tsü. Oman ya mapang talangka US aser Iran na tsüingda tongteprateptsür ka ama inyaka arudar.

Oman-isa, 2015 küm Iran aser linük balala tsüingda nuclear atema tenanzüktepba yangluba mapang tongtibang shilem agia liasü. Iba

tenangzüktepba kübok Iran-i nuclear inyakyim anentsü aser iba melen a parnok nem tenokdangba agütsür aliba agintsü nangzüktepa liasü, saka 2018 küm Trump-i iba tenangzüktepba nungi atsüingina liasü.

Iran-i ashiba agi, parnok indang nuclear inyakyimtem ya civilian nüngdak atema dang lir. Ajisüaka Israel aser US nati parnok ket nung meima nuclear arsenal ka alitsü ta bilemer.

Kasa mapang nung Netanyahu den külemi jembiba mapang Trump-i Gaza nung rara ya yakta tembangtsü akok ta ashi.

"Ni rara anendaksüner aser rara ya mapang ka nungbo anentsü aser mapang talangkabo magitsü," ta Trump-i Oval Office nung osangbenertem dang ashi. Ajisüaka pai ceasefire koma aser kodang benoktsü iba indang osang tejangja magütsü.

Netanyahu-i ashiba agi, January ita khen atema ceasefire benokba sülen tenangzüktepba tasen ka asoshi Israel-i inyakdar. January ita benokba ceasefire ya Israel-i March ita raksaogo aser Gaza maneni maka Palestine nunger aika tepsetdar.

"Tepuokertem ajak anir arutsü onok bendanga agütsür lir, aser iba den Gaza nungi Hamas telok samaja Gaza nung aliba nüburttem nem nüjiso agütsütsü onok nükjiong lir," ta pai ashi.

Israel lenirisa, pai Trump den Gaza atema pa nükla aliba indang sensaksemogo ta ashi. Netanyahu-i, Trump-i Gaza ya US-i azüoktsü atema benokba indang jembirba liasü.

Iba sentong ya aikati magizüker aser kin ka samatsütsü atema tasa asüba lir ta shia alima kintemi aitsüogo.

INDIAN COUNCIL OF MEDICAL RESEARCH, NEW DELHI

Adv. No.ICMR/DIR/RMRC/02/2025-PRCell

VACANCY CIRCULAR

Department of Health Research, Ministry of Health & Family Welfare kübok Autonomous Organization, Indian Council of Medical Research (ICMR)-i ICMR- Regional Medical Research Centre, Dibrugarh (ICMR-RMRC) nung Director mapa atema application jaoker koba April 21 nü nikonagsütsü 5:30 ako tashi nung benoktettsü. Itasen ya Pay Matrix Level 14 (Rs. 1,44,200-2,18,200) (7th CPC Scale) nung agütsütsü aser IMCR nung inyakerkem nem agütsüba ama allowance tem agütsütsü.

Advertisement dak sendakba nung osang tejangjaba agitsü atema ICMR indang website www.icmr.nic.in mesüra <https://recruit.icmr.org.in> semdang.

CBC 17152/12/0004/2526

Assistant Director-General (Admn.)

SOCIAL MEDIA NUNG OSANG PEROKSHIBAJI MEYIBA AGIR

Ni Mrs. Alemrangla D/o Kilennukshi Longkong Village Social Media ajanga Changtongya nunger ka Chungtia lushi nung tepseta lir ta osang perokshibaji ni mejangjai perokshiba lir, anungji O ya ni meyiba agir.

Date : 07-04-2025

Sd/-
Alemrangla
D/o Kilennukshi
Longkong Village

ALI TAYOKTSÜ LIR

1. 3 Pura. Foothill road tangshia 150 per sq.ft
2. Foothill leman Teak lu anasa, 120 per sq.ft
3. Showuba fly over anasa 190 / 250 / 310 per sq.ft

~ Contact : 9863826159

GOVERNMENT OF NAGALAND
DIRECTORATE OF HIGHER EDUCATION

NAGALAND: KOHIMA.

Website: www.highereducation.nagaland.gov.in Email: dir.highedu@gmail.com

NO.HED/SCHO/MISC/36/2025/546 Kohima, dated the 8th April, 2025

INFORMATION ON PAYMENT OF POST MATRIC
SCHOLARSHIP (PMS) 2023-24

This is to inform all beneficiaries of the **Post Matric Scholarship for ST students (2023-24)** whose names are on the beneficiary list but have not received their scholarships due to dormant/invalid/inactive bank accounts to send their active bank details through the given link/QR code.

Further, beneficiaries whose scholarship transactions failed due to bank account issues are directed to rectify and claim the scholarship **on or before 30th April 2025**. Beneficiaries failing to do the needful within the stipulated time shall lead to forfeiture of the scholarship and no further claims will be entertained. The forfeited scholarship amount will automatically be reverted back to the Government SNA Account. The beneficiary list can be accessed/viewed through the Directorate's website www.highereducation.nagaland.gov.in

<https://forms.gle/vSvvWCfgZuYL4nSv8>



Sd/-
(V. LOVITOLY SEMA), NCS
Ex-officio Director
Higher Education, Nagaland: Kohima.

ICC Men's Player of the Month atema Iyer nominate süogo



Rongchii/April 8, 2025 (Agencies): March int atema ICC Men's Player of the Month naroküm asoshi India nunger asayar Shreyas Iyer-a nominate süogo.

ICC Champions Trophy akokba mapang Iyer-i India team asoshi tongtumbang shilem agiba sülen pa iba naroküm atema shimogo.

Iba asayamung nung Iyer ya India team asoshi middle-order nung kanga tongtumbang asayar ka liasü, aser pai asaya asem

nung run 172 yanglua pa indang average 57.33 liasü.

Pai run aika yangluogo, ajisüaka team-i pai junga asayatsü nüngdakba mapa nung pai junga asayatetba atema talisa pa nominate asü asütsü ta amanger. Iba asayamung nung India nunger asayartem rongnungi Iyer-i run timba yanglu aser team timtem nung aliba shia pai junga asaya-a team aniteta liasü.

Group-stage nung New Zealand den asayaba mapang

mezünpurtemi junga masayatetba sülen Iyer-i kanga atasa asaya-a run 79 yanglu aser India team jenjang junga kümdaktsü.

Australia den semi-final asayaba mapanga asayatsü kanga saka aliba tesem ka nung pai run 45 yanglu aser iba sülen final nunga kanga junga asaya liasü. New Zealand den final asayaba mapanga pai run 48 yanglua India team takok dangi ani.

Iyer ya tangar dang nungi kechiba balaka ta süra, pai run yanglutetba dang masü saka pai pressure agiteter aser top-order-i junga masayatetba mapang pai asaya yanglushitsür.

Pai strike kanga junga melentepa asayatetba, pressure agitetba aser run arishiba mapang team tejakdangi aniba ajanga pa asaya kanga junga renloka aoba sayur aser India team nung tongtumbang asayar ka kümdaktsür.

New Zealand atema kanga junga asayaba sülen Iyer den March ita atema Jacob Duffy aser Rachin Ravindra nata nominate süogo.

United pur post-season tour atema Asia-i aotsü

Rongchii/April 8, 2025 (Agencies): Manchester United nungi asayartem Premier League asaya tatembangbuba asayaba sülen club indang mezüngbuba postseason tour asoshi Asia-i aotsü. Ketdangsürtemi ashiba agi, iba tour aoba kuli rongnung kaji revenue talila asoshi lir.

May 25 nü kidang Aston Villa den asayaba sülen United pur Kuala Lumpur nung May 28 aser Hong Kong nung May 30 nü asayatsü atema aotsü.

United pur tang asaya aliba season nung Europa League final nunga asayatsü akok, ajisüaka iba asaya yabo May 21 nü asayatsü.

United-i ashiba agi, iba tour ajanga asayar aser staff tem Asia nung fan tem den indang indanga sendakteptsü atema maongka agütsütsü aser iba den club nema iba tesem nung commercial partner tem den

sendakteptsü asoshi maongka agütsütsü.

"Tongtoibangsa tour fixtures tem ajanga revenue talila aazükdaktsür aser iba ajanga club tashi taitba kümdaktsü aser takok asoshi senotsü intoktsü lenmang lapoktsür," ta United CEO Omar Berrada-i ashi.

Football asaya nung asayamung tali asüba ajanga asayartem tali anibelemba indang ashishiba mapang United pur postseason tour atema sangdongogo.

United pur Scandinavia aser United States nung preseason friendlies tem asayatsü atema jangjaogo.

Club-i, staff tem mapa nungi aginba aser ticket jenjang ajungketba densema senotsü kümzüka ayutsü atema jenjang agi tenzükogo aser fan tem dang ashiba agi, club-i tang senotsü akoksaba ya makok kümogo.

NZ coach Stead-i ODI aser T20 coach mapa toktsütsü



Rongchii/April 8, 2025 (Agencies): Gary Stead-i taküm lemluwa New Zealand indang limited-overs head coach mapa toktsütsü aser Test team coach mapa maneni abentsü atema asadangdar.

Arishi küm 53 tain Stead ya asaya aliba mapang NZ team nungi Test pongu nung asayaogo aser iba sülen 1999 küm nungi coach mapa inyak tenzka liasü. Pa 2008 küm linük tetsür team coach aküm aser 2018 küm tebur team coach küma liasü.

One-day international format nung pa lenisüba nung New Zealand team 2019 küm World Cup final tonga asaya saka tia maka super over nung England makok.

Christchurch nung asosang Stead lenisüba nungsa NZ team pur 2021 küm T20 World Cup final tonga atu aser taküm Champions Trophy nunga final tonga asayaogo. Pai anir NZ team-i 2021 küm mezüngbuba World Test Championship final koka liasü.

New Zealand pur tawa Pakistan den limited-overs

asayamung ka asayaogo aser parnoki ODI aser T20 naprongla kokogo.

"Ni mapang tatsüka atema senzügenpong nungi anisüngzüka tarutsü atema bilemdangner," ta Stead-i ashiba New Zealand Cricket sangdong ka ajanga metetdaktsü.

"Ni lenmangtem asadangner saka ni ano coach mapang tatsükabo inyaktettsü ta bilemer saka format asemprongla nungbo masü.

"Taruba ita ka ana tsüngda kinüngtsü, kinunger aser tangartem den sensak asemtsü atema maongka angutsü."

"Iba mapang tsüngda ni Test coach atema apply asütsü masütsü aji jangja akümtsü," ta pai ashi.

June ita contract tembangba sülen Stead-i ODI aser T20 head coach mapa toktsütsü aser iba mapa atema pa melentsü asoshi taoba mapang South Africa coach Rob Walter shimsü imlar.

NZ pur taruba asayamung July ita Zimbabwe nung oa asayatsü lir.

Southampton manager Juric-i club toktsüogo



Rongchii/April 8, 2025 (Agencies): Deobarnü Premier League nungi relegate asüba sülen manager Ivan Juric-i club toktsütsü atema Southampton aser Juric na mulungtepogo.

Juric ya December ita küm ka ser tesadang atema Russell Martin melen shima liasü, saka pa lenisüba nung team-i asaya 16 nungi ana dang koka liasü.

Deobarnü goal 3-1 agi Tottenham makokba sülen asaya ti asayatsü anunga lia parnok Premier League nungi relegate süogo. Premier League puti otsü nung Southampton pur takaratiba relegate süogo.

Spurs makokba ya Southampton atema tang asaya aliba season nung league nung asaya 25buba

makokba liasü.

"Mapang tamajung ka nung Ivan Southampton-i aru aser team jenjang yanglushitsü atema nonglokja liasü," ta Southampton-i ashi.

"Tia maka onoki imlaba ama terenlok kecha maliasü, saka onoki Ivan aser pa indang staff tem dang parnoki ochishia aser meranga inyakba atema kanga pelar.

"Championship-i relegate asüba jangjaba sülen fan aser asayartem aser staff tem nem tarutsü atema ken o jangjatsütsü nüngdaker, kechiyong taküm lemluwa ya kanga tongtiba asütsü," ta club sangdong ajangasa metetdaktsü.

Simon Rusk-i interim manager mapa bena atatsü aser pa nem Adam Lallana-i assistant ama teyari agütsütsü.

Juric ya November ita Roma-i mapa nungi anentsüba sülen Southampton nung dena liasü. Pa lenisüba nung Serie A club ya asaya 12 dang asaya liasü.

Arishi küm 49 tain coach ya taoba mapang Italy nung Torino, Hellas Verona, Genoa, Crotone aser Mantova indang coach liasü.

Southampton pur taoba küm lemluwa play-offs nung Leeds akokba sülen Premier League-i promote asü, ajisüaka parnoki tetenzük nungi junga masayatet.

Parnoki mezüngbuba asaya teku nungi ti makok aser November 2 nü Everton goal 1-0 agi akokba ya asaya 23 nung asaya ka akokba liasü.

Juric, shibai taoba mapang England nung khien danga inyakdanga maliasü pai team majungmesotet aser mezüngbuba asaya trok nung tamakok ngua liasü.

Parnok ya top-flight nung asaya 31 nungi asaya 25 makokba team tasembuba dang lir. 2005-06 season nung Sunderland aser 2020-21 season nung Sheffield United natia asaya 25 mekoki liasü.

Southampton ya league nung gaol timtiba (74) achiba team kümogo aser English football nung division pezü nung goal ishitiba agütsüba (asaya 31 nung goal 23) team lir.

BILEMDANGANG

"Kaket maliba takdang kaji tanüla maliba taküm ka mesüker."